

平涼縣志卷之三

教育<sub>七</sub> 風俗<sub>八</sub> 人物<sub>九</sub> 列女<sub>附</sub>

平涼縣志卷之三

教育

育才之法成周備矣家有塾党有庠幾至無地無學無人不學後世補偏救弊始選舉其才繼以九品貢舉科目之設亦莫不因時制宜以收效於一時也清踵明制縣置儒學教諭一員以敷教與賢然其教僅及於一邑之秀其未隸名學籍者不與焉民國一反其舊而矯之以學校置勸學所長主其事旋改為教育局長各就地選任以謀教育之普及策進行法較善也顧其教材則偏重物質而於吾人固有之良不之講也殊非務本濬源之道因備論之以俟後之君子考擇焉

清沿明制學使每三年蒞考歲科試各一次平涼歲考取文生十二名武生十二名科考如之無武生凡考取者送縣學肄業名曰附生逢歲科試考列一等有廩增缺即補曰廩生增生列二等者僅幫增遇廩缺由增生先補之廩生明制月給米六斗清則年給銀六兩而已惟逢歲考依名次得出貢一名曰歲貢逢覃恩年曰恩貢其選用高歲貢一級歲貢以訓導用恩貢以教諭用此常格也又有拔茂甄異之途每十二年考取一名曰拔貢朝考列一等二名者以七品京官用其下以知縣用二等以州判用二等得以州判或教諭注册候選學使每臨考試下車伊始先謁文廟後到府學明倫堂衣朝服同提調各屬教官席地聽講聖諭畢更衣升堂各教官請學使抽籤諸

生自由講書回考院出示場規及考試日期明日即試縣學諸生以詩賦名曰古場又明日試諸生以律詩八股曰正場又明日試童生又明日復試諸生最後復試童生凡五日而畢縣學諸生歲試湏應考否則名欠考功令下次補考其年老有疾者准告頂不赴歲試矣

縣學廩膳生二十名增廣生二十名與歲科試考取之附生統名曰縣學諸生由學官管教以培植焉

書院屬郡立者曰柳湖書院創於清初為一郡書院同治末改為五郡諸生肄業之所由本道聘科甲者為山長監院一府學教官任之齋長二選考課前茅者充之每月官課一次道府縣輪流堂課二次由山長批改官課考列超等特給膏火獎賞列一等月給麪堂課取列前名亦給獎賞書聲嘹亮人才濟濟較之府縣各學得士為最盛縣建者曰

高平講舍本籍廩增附及童生肄業其中山長聘在籍或外縣科甲人員任之監學會計各一選地方紳士任之官課每月一次諸生考列超特者給獎賞膏火堂課由山長評定甲乙不給獎賞課程先八股試帖後改策論停考試時改為平涼縣第一高等小學嗣改中山小學校今日西街小學又有義學十三處每處月給脩金三兩塾師每年由縣就諸生中考充之貧家子弟亦得藉以造就

省立中學校清光緒三十一年就柳湖書院欸項改設隴東中學堂後

由省添加經費改曰甘肅省立第二中學校旋改今名學生常數百人課程列左

公民 國文 英語 算術 歷史 地理 自然  
作文 音樂 圖畫 社會 衛生 勞作 體育  
童子軍 公牘文 生活指導

省立平涼師範學校民國六年創建於縣文廟西曰甘肅省立第七師範後移於柳湖書院改今名內附高初級小學各一班師範生四班課程如左

公民 教育 國文 數學 自然 歷史 地理  
勞作 音樂 美術 體育 童子軍

省立平涼女子師範民國二十一年創設現有師範生二班內附小學一班初級小學四班課程如左

公民 教育 國文 歷史 地理 自然 家事  
數學 美術 音樂 勞作 體育 童子軍

縣立學校第一區

平涼縣立西街小學校

平涼縣立西街女子小學校

平涼縣立東關小學校

平涼縣附設初級小學校

區立上寺台女子初級小學校

區立和陽街女子初級小學校

區立慈恩寺初級小學校

區立北寺初級小學校

區立南寺初級小學校

區立雙橋子初級小學校

區立水橋溝初級小學校

區立紙房溝初級小學校

區立郭家園初級小學校

區立軍民張初級小學校

馬祖廟短期小學校

末家灣短期小學校

甲積峪短期小學校

## 第二區

區立四十里舖小學校

區立曹家灣初級小學校

區立鄆峴鎮初級小學校

區立大陳家初級小學校

五岳溝短期小學校

土古堆短期小學校

老庄窪短期小學校

第三區

區立白水鎮小學校

區立花所鎮小學校

區立侍郎廟小學校

區立馬蓮舖初級小學校

區立打虎溝初級小學校

區立野雀溝初級小學校

區立大潘家初級小學校

區立史家溝初級小學校

區立莎蘿鎮初級小學校

區立汝家塬初級小學校

區立甄家莊初級小學校

區立信家莊初級小學校

區立趙家寨初級小學校

甘溝莊短期小學校

胡柳莊短期小學校

十里舖短期小學校

第四區

區立鄭家窪初級小學校

區立武家源初級小學校

區立鄭家新莊初級小學校

區立余家寨初級小學校

區立丁家寨初級小學校

區立陳家窪初級小學校

區立楊家莊初級小學校

區立長溝渠初級小學校

盤龍山短期小學校

佛堂寺短期小學校

雙廟子短期小學校

#### 第五區

區立安國鎮初級小學校

區立頁河子初級小學校

區立三天門初級小學校

區立寨子街初級小學校

區立趙家莊初級小學校

區立秦家大莊初級小學校

頁溝莊短期小學校

馬武河短期小學校

上吳家短期小學校

#### 附學產學款一覽表

類別 項 目 每年入款數額

學 川中地四八三九一畝川下地三七五畝  
 中地七七三畝塬上地三五二六六畝  
 五五七四七一九元

田 甘溝窪護林兩處  
 每年由該地顧姓看護約有十數畝

基金 五一 六六二五元  
 息金九 三六 五元

磨產 頭道渠一二四五六七八等棚水磨共  
 七座 六二 元

房產 鋪面二十二處院落一處店房三處  
 一六四八、五元

鹽課 一五七六、一一三元

畜佣 本市 花所鎮  
 一八二八、五元

斗佣 白水鎮花所鎮  
 六四七、二元

秤佣 本市鹽秤白水鎮花所鎮四十里  
 鋪雜貨秤 二八七九元

行 斗行三家皮行八家屠宰過載三家  
 燒坊山貨鉄紙葯材石灰花布染水駝  
 二四四五三七四元

捐 騾 青果百貨油炭等行

合計 一三一 五七六五元

勸學所長記名

高溥明 王廷獻

趙佐清 王 璽

教育局長記名

朱生燦 邵席珍

陳明新 宋國傑

林鳳棲



風俗

明一統志云平涼民俗純樸近古曆代之衰豪猾蠹起吾鄉迄未有輟耕而歎者已千百年於茲矣蓋嗜詩書慕忠義其賦性然也喪葬多作佛事婚嫁尤儉聘禮用掛掛者制錢八百文也或八掛十掛多者十二掛女家不尚妝奩男家僅製布衣一襲表衣單棉隨時令裡衣則雖盛暑其祆褲必用棉者親友問訊以饅頭為禮或十枚二十枚農家皆釀黃酒大家或釀至數甕客至輒釀以相勞不煩沽也邇來歐風灌輸遊宦浪子服食僭侈土人踵效羞不及窮奢至破其產半皆枵腹裸體老成典型不可復睹矣然閭里猥瑣之俗猶有存者正月五日昧爽掃除院宇擲其塵遠野曰送窮土是日女不舉紅日舉之則刺窮 隆十五前一日迎女之已嫁者其壻與偕十六日婦女盡出遊曰散百病即否且病二十三日夜剪紙人刺孔遍身煨火當門子女皆繞火跳越之已而焚紙人其上曰燎疔二月二日炒各種豆食之曰殺蟲六月六日出所貯衣曝之曰如此則不蠹臘月二十三日以糖獻灶神曰是衣神詣天帝白人短獻之以膠其口二十夜全家聚飲不就枕曰守歲又煮豚蹄爛甚食之曰齧鬼錄之以存古俗之一班至其俚詞土語有與他方異者亦附見於後

太爺 曾祖父之稱 太太 曾祖母之稱 爸 稱族伯叔父或戚友中同齒於父者之詞 老老 稱伯叔父 峭欠 詢候長者之詞

你緩着 安慰病人之詞 乖爽 問小兒之詞 尋麻達 給人尋衅之稱 唉呀呀 惡煩之詞 肖活子 強壯

之詞 沒來頭 謂人不大要緊也 白日鬼 謂人之無能也 妝花鬼 謂人之無能而自以為能也 冒日鬼 謂人之荒唐也

沒交線

謂事不大要緊也

明兩兒

將來之謂

新發戶

謂新發財者

狼頭客

謂人之慳吝吃重不吃輕也

惡昂髒稀

皆不潔淨之詞

勞倒難纏

謂人之費事

黠闖伶俐

謂人之敏巧

我的光當

驚訝之詞

丁當的很

謂強壯至極

揭天

謂殯葬父母曰揭天

堆累兀

不中用之謂

糴子客

謂人之不明白也

訂詳

謂人之可靠

作你嘎

不悅而反問之詞

嘍嘍

郎口切音樓呼猪

啾啾

呼鷄

唛唛

昆必切呼貓

啞啞

呼狗也

真哥媽

初不信而反驚問之詞

嘍來哥

即夜來哥之變音猶言昨日也

而更

即而今之變音也

那哥

說不出口者輒以那哥代之

### 人物

平之為邑地據上游所謂奇男子者不可勝數然春秋以前靡得而考也今取傳記所著者列於篇

漢

皇甫規字威明祖校度將軍父旗扶風都尉永和六年西羌侵安定郡將知規有兵略乃命為功曹使將甲士八百與羌交戰有功梁太后臨朝規舉賢良方正對策梁冀忿其刺已下第免歸州郡承冀旨幾陷於死遂以詩易教授門徒積十四年後梁冀誅旬月之間禮命五至皆不就泰山賊侵亂郡縣後拜泰山太守到官廣設方略寇虜悉平延熹四年秋叛羌寇關中規請自効三公舉規為中郎將大破之諸羌慕規之威信相勸降者十餘萬東羌既平涼州復通論功當封而中常侍徐璜左瑁欲從求貨規終不答遂排陷坐繫廷尉論輸左校諸公及太學生張鳳等三百餘人詣闕訟之會赦歸家徵拜度遼將軍上書荐中郎將張奐以自代規以連在大位欲退避

數上病不見聽會友人王旻喪還規越界迎之因令客密告并州刺史胡芳使舉奏芳曰威明欲避第仕途吾當為朝廷愛才遂無所問及党事大起規自以西州豪傑恥不得與乃先自上言臣前荐故大司農張奐是附党也又昔論輸左校時太學生張鳳等上書訟臣是為党人所附也臣宜坐之朝廷知而不問在事數載北邊畏服遷宏農太守封壽城亭侯不受轉護羌校尉所著書二十七篇皇甫嵩字義真規兄子父節雁門太守嵩少有文武志介好詩書習弓馬舉孝廉茂才俱不起靈帝時為議郎遷北地太守黃巾賊起召辟臣會議嵩以為宜解党禁帝從之以嵩為左中郎將討黃巾波才於陽翟擊彭脫於西華並破之已又討張角弟梁寶悉破之先後生擒斬首降服三十餘萬人角死剖棺戮屍傳首京師封槐里侯領冀州牧奏請冀州一年田租以贍民帝從之民歌其德信都令閭忠說嵩建不賞之功北面庸主無以自安後悔莫及嵩守節不屈忠亡去中常侍趙忠張讓憾嵩奏收印綬更封都鄉侯五年梁州賊王國圍陳倉復拜左將軍督兵擊大破之斬首萬餘級國走死董卓故怨嵩及秉政乃徵嵩為城門校尉有司承旨奏嵩下吏將遂誅之嵩子堅壽泣掬得免及卓誅復拜征西將軍遷車騎將軍又拜大尉為光祿大夫嵩為人愛慎盡勤前後上表陳諫五百餘事皆有補益手書毀草不宣於外又折節下士門無留客人皆稱而附之也

梁統字仲寧晉大夫梁益耳之後性剛毅而好法律更始召拜酒泉太守會更始敗赤眉入長安統與竇融及諸郡起兵保境衆推統為武威太守為政嚴猛威行鄰郡建武五年遣使詣闕奉旨詔加統為宣德將軍八年光武自征隗囂統將兵會車駕封統為威義侯後詣京師更封高山侯拜中大夫統在朝廷數陳便宜以為宜重刑罰以遵舊典後出為九江太守封陵鄉侯統在郡有治迹吏人畏愛之子松嗣梁松字伯孫為虎賁中郎將博通經書明習故事與諸儒修明堂辟雍郊祀封禪禮儀永平元年遷太僕子扈亦敦詩書為長樂少府梁竦字敬叔少習孟氏易弱冠即能教授竦固宦家子坐事徙九真濟湘沅悼子胥屈原作悼騷賦擊石沈之顯宗詔還本郡閉門以經籍為慰著書名曰七序班固見曰七序出而竊位素餐者恥矣性好施負才鬱鬱嘗登高歎息曰丈夫生當封侯死當廟食不然閒居可以養志讀書足以自娛州郡之職徒勞人耳辟命交至並無所就

梁商字伯夏竦之孫以外戚拜郎中陽嘉元年女立為皇后以商為大將軍商自以戚屬居大位每存謙柔虛己進賢京師翕然稱為良輔每有飢饉輒載租穀賑出貧餒不宣己惠檢御門族未嘗以權盛干法中常侍張達等譖商帝怒收達等悉伏誅辭所連染及在位大臣商上疏請罪止首惡帝納之病篤勅子曰氣絕之後斂以時服無更裁制祭食為存無用三牲及薨諸子欲從其誨朝廷不聽謚忠侯

皇甫麟字真駒家世簪纓性卓越夙負物望一時豪傑無出其右者  
刺史王公聞麟名辟為州都尋拜主簿延興中涇州夷民萬餘家詣  
闕申訴請麟為統酋朝議以戎華勢隔本不相豫不允帝以夷民丹  
情難奪中旨許之太和二十年仇池不靖扇逼涇隴麟望著西陲群  
酋帖服特旨召為中書博士加議郎麟馳驛慰勞陳示禍福兇頑感悟  
面縛歸降者數萬人刺史任城王嘉其遠量表為長史麟策謀深沉  
聲震朝廷復除為清水太守領帶軍鎮景明元年除為別駕而佐  
弼有方民士悅之景明三年督護新平安定二郡事正始元年河州  
刺史梁公以開塞地險非麟無可與鎮撫者復表為武始太守正始  
三年秦涇叛逆都督楊公以麟權略多端深達軍要表為都長史正  
始四年還鄉刺史元王復表為別駕麟以年老固辭不許王重加厚禮  
頻命乃就麟生平屢歷顯官垂登方岳而意氣蕭條常內自貶抑若  
微賤然凡所佐蒞丹心奉公視金帛如草芥其墓誌贊曰雖伯魚之無  
私楊震之賤賄方之於君未足嘉也年七十有五卒於家

皇甫和字長諧祖澄秦涼二州刺史父徽安定略陽二郡太守和年十  
一而孤母夏侯氏授以經及長深沉有雅量尤明禮儀宗親凶吉多相  
諮訪終濟陰太守

皇甫亮字君翼和弟神武命為太守行台郎中亮率性任真不樂劇  
職除司徒東閣祭酒授降梁以母兄在北求還梁帝不奪至鄴無復  
宦情人白鹿山恣泉石之賞賦詩超然自樂性純樸無片言矯飾後

除任城太守病不之官終於鄴

晉

皇甫謐字士安漢太尉嵩曾孫出後叔父年二十不學所後叔母任氏責其不學對之流涕謐乃感激居貧躬自稼穡帶經而農遂博綜典籍百家之言沈靜寡欲有高尚之志以著述為務自號元晏先生遂不仕耽翫典籍忘寢食時人謂之書淫舉辟皆不行或勸應命謐為釋勸論以通志武帝屢詔敦迫謐辭切言至遂見聽許自表就帝借書帝送書一車與之所著詩賦誄誦又撰帝王世紀年曆高士逸士烈女等傳元晏春秋並重於當世

皇甫方回謐子少遵父操兼有文才閉戶齋居未嘗入城府蠶而後衣耕而後食先人後己尊賢愛物南土人民咸崇敬之刺史陶侃禮之甚厚每造之著素土服望門輒下而進

皇甫重字倫叔性沉果有才用為司空張華所知元康中為秦州刺史重弟商為長沙王又參軍河間王融遣四郡兵攻之商間行齋帝手詔使四郡罷兵令重進軍討融融捕得商殺之又既敗重猶堅守四郡兵築土山攻城重輒以連弩射之所在為地窟兵不得近城將士為之死戰後知商為融所殺無外援遂遇害

張肅軌弟寔叔父建威將軍以京師危逼請為先鋒擊劉曜寔以肅年老不許肅曰受晉寵秩剖符列位今國運方艱朝廷有難不奮何以為臣寔以軍旅非耆老所堪終不用既而肅聞京師陷遂悲憤卒

張軌字士彥少明敏好學有器望與同郡皇甫謐善隱於宜陽汝山張華與軌論經義及政事損益甚器之除太子舍人累遷散騎常侍公卿舉軌才堪御遠永寧初出為涼州刺史鮮卑反軌到官即破之威著西州化行河右立學校行鄉射之禮及河間成都二王之難遣兵三千東赴京師永興中鮮卑若羅拔能為寇軌擊斬之俘十餘萬口威名大震惠帝遣加安西將軍大城姑臧永嘉初東羌校尉韓雅殺秦州刺史張輔軌討之雅降王彌寇洛陽軌擊破之又敗劉聰於河東帝嘉其忠進封西平郡公不受遣使貢獻歲時不絕朝廷嘉之京師飢匱軌即遣參軍杜勲獻馬五百匹氈布三萬疋帝遣使拜鎮西將軍都督隴右諸軍事劉聰逼洛陽軌遣兵入衛及京都陷軌馳檄關中翼戴帝室秦王為皇太子遣使拜為驃騎大將軍儀同三司固辭在州十三年寢疾遣令將佐盡忠報國務安百姓謚曰武子寔

### 虞溥察孝廉除郎中

皇甫真字楚季安定朝那人也弱冠以高才庖拜為遼東國侍郎孰嗣位遷平州別駕時內難連年百姓勞瘁真議欲寬減歲賦休息力役不合旨免官後以破麻秋之功拜奉車都尉守遼東營丘二郡太子皆有善政及僞僭位人為典書令後從慕容評攻拔鄴都珍貨充溢真一無所取惟存恤人物收圖籍而已僞臨終與慕容恪等俱受顧託慕與根將謀為亂真陰查知之乃言於恪請除之恪未忍顯其事俄而

根謀發伏誅恪謝真曰不從君言幾成禍敗呂護之叛恪謀於朝曰遠人不服修文德以來之今護宜以恩詔降乎不宜以兵戎取也真曰護九年之間三背王命揆其奸心凶悖未已明公方飲馬江湘勒銘劍閣况護蕞爾近畿而不梟戮宜以兵算取之不可復以文檄喻也恪從之以真為冠軍將軍別駕都督師還拜鎮西將軍等州刺史鎮護匈奴中郎將徵還拜侍中光祿大夫累遷太尉侍中苻堅密謀兼併欲觀審釁隙乃遣其西戎主簿郭辯潛結匈奴左賢王曹轂令轂遣使詣鄴辯因從之真兄典仕苻堅為散騎常侍從子奮覆並顯關西辯既至鄴歷造公卿言於真曰辯家為秦所誅故寄命曹王貴兄常侍及奮覆兄弟並相知在素真怒曰臣無境外之交斯言何以及我君似奸人得無因緣假託乎乃白暉請窮詰之暉評不許辯還謂堅言燕朝無綱紀實可圖之鑿機識變惟皇甫真耳堅曰以六州之地豈無智識士一人哉真亦秦人而燕用之固知關西多君子矣真性清儉寡慾不營產業飲酒至石餘不亂雅好屬文凡著詩賦四十餘篇王猛入鄴真望馬首拜之明日更見語乃卿猛猛曰昨拜今卿何恭慢之相違也真答曰卿昨為賊朝是國士吾拜賊而卿國士何所怪也猛大嘉之謂權翼曰皇甫真故大器也從堅入關為奉車都尉數歲而死

隋

皇甫績字功明祖穆魏隴東太守父道周湖州刺史績三歲而孤外祖



韋孝寬愍其孤幼不加嚴訓績歎曰我無庭訓何以自立遂感激好學略涉經史周武帝時引為侍讀轉宮尹中士武帝避暑雲陽宮衛刺王作亂百僚多遜績聞難赴之遇太子於元武門太子執績手悲喜交集帝聞而嘉之開皇初拜都官尚書出為晉州刺言陳有三可滅上嘉勞而遣之及陳平拜蘇州刺史高智慧等作亂破之拜信州總管徵還京師卒諡安田德懋觀國公仁恭子少以孝友著名開皇初以父軍功爵平原郡公授太子千牛備身丁父艱哀毀骨立廬於墓側負土成坟上聞而嘉之遣侍郎元志就吊仍降璽書褒美賜縑二百匹米百石詔表其門閭歷太子舍人義州司馬尚書駕部郎皇甫誕字元憲少剛毅有器局周畢王引為曹參軍隋高祖受禪為兵部侍郎出為魯州刺史復為刑部侍郎俱有能名遷治書侍御史朝臣無不嚴憚上以百姓多流亡命誕為河南道大使以檢括之及還奏事稱旨上甚悅令判大理少卿尋轉尚書佐丞時漢王諒為并州總管朝廷盛選僚佐上以誕公方著稱拜并州總管司馬總府政事一以咨之及煬帝徵諒入朝諒發兵作亂誕數諫止不納因涕曰願王奉詔入朝守臣子之節如更遷延陷身叛逆求為黔首不可得也諒怒囚之及楊素將至諒屯兵清源以拒之諒主簿豆盧毓出誕於獄協謀開城拒諒諒襲破之抗節遇害帝以誕亡身殉國嘉悼之下詔褒顯贈柱國封宏義公諡曰明

田仁恭舉明經官武威大將軍

劉偲辟經明行修授御史

張仲賢辟孝廉灤州知州

明

段寧字伯安城南人舉順天丙子科丁丑進士授行人司行人奉使琉球國王賜三品服色

林廷玉字粹夫本福建侯官籍以父芝教授平涼遂家焉成化二十年進士授吏科給事中劾僧維曉棄市中外快之升工科都給事中學士程敏政主會試給事中華敞劾其賣題下獄廷玉言諫官下獄被劾官顧朝參非法請同敏政入獄以昭公道謫廷玉海州判官稍遷茶陵知州歷右通政僉都御史巡撫保定劾太僕丞索賂暴民者丞恃中助反誣於玉罷之嘉靖初吏部侍郎胡世寧荐玉骨鯁有風裁宜引助新政不果用

張倫成化十四年進士清直自勵學以經濟為先任南京戶部主事郎中俸悉給官費無遺留丙午河陝大飢倫請發江淮運米數十萬往賑旱甚河漕運阻百方經劑濟以陸輓致米二十餘萬不能至者糴之河南以估金賑陝活數千萬人竟以勞卒於河南人為立祠趙斌字時憲宏治十三年進士温厚寡言有膽略為舉人時路遇盜數十人斌下馬持弓盜問何人斌從容曰吾平涼趙斌矢不空發盜馳去以行人擢監察御史凡十餘年掌京畿道陞應天府丞歷任為

政咸有方略

趙時春字景仁為人嚴毅介特與士大夫處意有所不可議論不合必引繩按矩詰責之不少貸人服其正年十四舉於鄉踰四年舉嘉靖五年會試第一授庶吉士改戶部主事尋調兵部九年疏請禁諛佞正士風又疏請崇治本信號令廣延訪勵廉恥惜人才固疆圉正治教七事詔下獄黜為民已起編修兼司經局校書帝有疾疏請東宮御殿受正旦朝賀復黜為民會京師被寇世宗用荐詔為兵部職方主事仇鸞恃寵倡馬市損國擾邊時春抗議不合又以能兵為鸞所忌幾得罪稍遷山東僉事轉副使三十二年擢巡撫山西僉都御史提督雁門諸關武備甚修其為政斥貪墨省征徭抑請託絕饋遺宗藩貴宦相戒不敢犯法其年九月寇入神池利民諸堡時春率兵往禦擐甲策馬至大蟲嶺遇伏兵敗績被論解官時春少喜談兵讀書強記凡天文地理戶口多寡之數能曆曆誦之所為文章豪肆與唐順之王慎中齊名唐順之嘗曰宋有歐蘇明有王趙其推重如此著有浚谷集行世

周鑑字子明舉嘉靖三十一年鄉試第一三十二年進士授刑部主事考最陞僉事督學四川山東一時得士最盛名士多出其門陞河南左布政使遷石副都御史鑑有政才所至多風力持法嚴人不敢犯雖藩府每事必裁抑妖賊曹倫起儀封鑑擒斬之所司具狀上聞為忌者所沮抑竟未叙功張居正當國威震朝野以葬親歸道過河南鄉大夫迎謁禮甚卑鑑獨守常儀居正不悅語人曰周子明殊無東

道意鑑遂抗章自劾求去凡五上未允部議擬調俄有中旨准致仕歸家

連捷字金門工舉子業試輒冠儕輩名著諸生間舉天啟元年鄉試為人寬和尤敦友讓與弟芳同居終身無閑言素恬靜不與人爭競未見有睚眦之怨鄉曲皆稱之

趙玉時春父也正德二年省親平谷途拾旅金二百兩還之以歲貢任元城霑化學訓導課士不辭勞瘁視諸生如子弟已而登科者十餘人

第進士則有張壽崗常立清胡大定梁聯馨朱諶吳之璘巨敬張紹學張倫李伸張幾高傑桑阡孫廷相孟學易壽崗庶吉士官同知立清翰林院檢討大定聯馨員外郎諶不仕之璘官知縣敬紹學官主事倫官郎中幾傑官檢事阡官長史廷相官知府學易官副使伸亦不仕

舉人凡五十五張翱王規張茂張孟昇張倌俱知州王翔平塘李逢春高侃朱鸞俱通判孟欽唐進宋益王傑呂忠施溥賀鼎賀瑄王浩陳新賀溥張亨邢大經杜恩唐臣賀祥趙文顯趙應裕王治劉令譽劉盈科朱愉梅江德泰俱知縣侯廣胡進律俱同知樊瑱光祿寺署正張國士王滾教授知府則有周宗泰其禾仕則有索達閏全唐俊張鵬施溥胡順張世選楊廷美孟奇趙佩唐繼參張諤王可嘉趙蘭周汝灝原高王肇衍劉芳堃俱副榜肇衍官教授自明以

前人物輩出前固磊落相望後更步武聯翩曆清至今垂三百年其翹出者不數賭矣然苟少有節行而猶得列官籍者俱不忍剗削焉選拔胡廷佐趙青藜青藜子蓉鏡字晴湖王玉馮璋王廷魁王業久王駿周宗濂孫觀海朱沅任懷遠秦家璽王維本高壽崗郭修劉耀堂廷佐處鄉党敦厚能周人急難事曆官淮徐兵備道時淮徐府縣兩庠以拖欠錢糧被黜者七十人以上廷佐出貲代償之悉復其名兩庠為泐頌德碑青藜字星乙累代皆郡縣諸生青藜少失恃事父孝既長苦於學道光乙酉拔貢就教職夙負鄉望郡守邑宰至咸造其間終介介不事干謁以澹台子羽目之陝回之叛而西也固原塩茶逆回並起華亭迤南諸回堡復煽動平涼攝其間回族尤衆群情震懾知府田壽增延青藜總防局繕城垣製大炮守具略備時回既殺漢民漢益仇回青藜持論平謂叛者剿之示以義也餘則撫之覆以仁也今宜睦內安外毋狃積怨啟他衅壽增趨之俄而護總督某委監司大吏賈尺書東來招撫塩固甯靈諸叛衆且盡撤平郡民團自是自毀藩籬不啻揖盜賊而入堂奧矣回衆既益橫遂有同治元年十二月焚郡東關及太平岨峪二橋之事居民忿甚猝集團擁入防局殺回族貢生糟彥禮青藜救之不得初八日回族集城下請出糟貢生無以應擲其首而與之回族遂引固原賊圍城十旬不解青藜進計縋候選訓導邱鳳巢李翰華等突圍出乞師於慶陽慶陽新制軍駐兵處也鳳巢等既至伏地哭不止乃遣慶陽知府和英以數

百人來距城四十里壁山上賊斷其汲軍盡覆和英死之援遂絕而  
逆首穆生輝憤郡人掘其先墓復率數千賊來攻城青藜作書寄  
子蓉鏡都門大旨謂郡城危若累卵我臨時自有斟酌幸爾在  
外趙氏宗祀尚不斬他日收我骨可也二年八月十二日平涼城陷青  
藜與繼室朱氏及子婦等皆赴井死大書於壁曰我與老妻死前院  
井子婦及女死後園井淡於榮利喜琴書承平時闢宅後地手執松  
竹花木構草廬數椽與朋友觴詠其中額曰愛曰山房有愛曰山房  
文集若干行世逾年大軍克平涼蓉鏡奔喪出青藜夫婦及其妻  
周氏女儂姑屍於井面如生聞於上贈青藜國子監助教給雲騎尉  
世職眷屬旌卹如例八年陝甘總督左宗棠駐師平涼聞青藜死  
節狀親至其居見室宇焚燬惟所題壁巋然猶存命工摹勒上石鐫  
甫竟而壁頽人謂精誠所結云蓉鏡光緒初官刑部主事掌監察御  
史有直聲所論奏無不關國家機事當上心者京外有大疑獄蓉鏡  
輒往治不少假借具得其實朝廷方嚮蓉鏡將大用之尋卒王玉  
馮璋同治兵燹殉難王廷魁不仕業久宗濂觀海官知縣家璽曆署  
文縣敦煌各縣教諭性嗜書年七十矣猶每日伏几摹寫不懈壽尚  
署化平教諭工書能文有翰苑志迄不果賫志以歿惜哉修舉衆議  
院議員楷書行草為一時所僅有維本才具優長堪任煩劇曆署甯  
縣華亭靈台各縣教諭卒未博得一縣令為之一喟耀堂官州判  
劉俊升字尚鶴舉同治初元制科謁吏部得直隸知縣權無極平

山尋授博野之官拿辦積匪馬全潰大府器之保以直隸州升用越二年調靈壽時當飢饉之餘乃急與修義社各倉勸民捐輸年餘倉廩屹立積粟亦盈城鎮各義學規復如舊而京南患水乃檄調保定辦賑甫抵任即籌疏導藉施工賑購船隻轉運貨物使無生計者得全活是時北區崔馬潘三村沉沒巨浸中僅留百餘戶無寸田可耕適南區馬廩地十三頃餘津民三姓管業頻年爭訟於是呈請府尹撥帑千金購回刊發執照給三村無田者為永業所餘十數畝建村名三合莊操作者得居止焉事聞傳旨嘉獎村民醵金立祠明年遷三河三河衝繁久困差徭俊升任事民不支一錢感甚乃為歌數闕闕皆有劉青天句升俊服官直隸也受知於順天府尹陳爨及陳尹遷皖撫又調任懷柔蒞任時適豫王府議增租民情汹汹俊升不畏權貴據理直爭事得寢士民欽其清鯁也見衙署傾頹乃為醵貲新之公任平谷時創辦縣市紡織各廠兼籌運銷未幾又調東安不踰年復遷保定至是三之矣已而卒壽七十有三其遠祖名銳字鼎甫陝西富平人康熙癸丑進士官兵部主事當滇藩之亂陝提王輔臣叛平涼附之政府命將軍圖公海討之銳襄贊機務積功保知府留守平涼遂家焉銳恬退廉潔在官三十餘年囊無長物惟耽翰墨著有虛谷齋文集青讀堂詩草有名天祥字雲卿者亦其先世也精研書法善作摹稟大字今瓦亭峽削崖石刻峭壁奔流四字即其手書也俊升之子曰瑞年善書能文尤工詩歌稱其家

兒也官陝西知縣名連升者俊升之族弟也書法冠儕輩為諸生時喜談兵同治之亂投身戎幕轉戰西北數省屢立奇功以提督記名官榆林總兵為忌嫉者劾罷之先俊升而舉制科者為朱遜志陳俶清遜志官訓導後之者則李增芳李廷楨高溥明王廷璽陳炳璋高星北其以監生入貲官陝西鳳縣者有郭建本在官數歲民感戴之

尹廷弼何壽春任繼先高步月張漢儒韓厚德信中選王志仁張金鑄王汝佐郭毓秀袁鶴書馬士傑林兆瑞楊學震孟占鰲馬秀儒馬兆麟馬獻瑞蘇長慶王殿元朱良傑王安民賈國壽鄭文炳單登瀛朱履謙高象健王萬鎰曹向文柳國藩王廷獻王希斌車維新陳邦彥王國楨李佑文鐵銘杜生第王如用俱歲貢廷弼少讀書刻苦性嚴正事有不可即拂然去人有不善輒王色詰責之不少貸三十失偶終身不再娶後授文縣訓導壽春繼先官教諭步月漢儒官學正厚德中選官訓導志仁不仕為人沈默寡慾嗜古籍自經史百家九流雜技無不耽玩盡悉卜筮醫方地理字書之屬有以非禮干者公輒笑謝不與校終不對人白其辱已狀曰白之是重吾不德也有子一人無他產業治圃藝蔬菜鬻以自給年七十餘手不釋卷卒之日往臨者猶見公手一殘篇云金鑄性剛正事事守先正典型不少變耽心經術授徒自給凡九舉鄉試未第意豁如也鶴髮童顏年八十餘無疾而終學震字漢卿我師也處世得老子退一步法



終身不與人爭清光緒初元舉孝廉方正不起楷書八股試帖均冠一時授徒數十年縣學科歲試共取弟子員十二名出其門者輒六七人人號為楊半榜卒年八十有四文炳家貧且讀且耕嗇衣縮食他人莫能如半生授徒北鄉士子皆其門下也履謙友愛兄弟人無間言常年授徒不干餘事博士弟子員出其門甚夥國楨性耽泉石無心仕進年七十猶授徒不輟於壬戌年七月望間嘗患痢醫治不效至二十間腹中有積痞一縷硬如石危甚不合睫者數夜二十七夜將分忽寐見偉人古衣冠贈書一本擲視每張阿彌陀佛一句閱之徧見尾頁云飲水食棗立除沈疴藥王善後永不復作四句偉人瀕行曰吾王斗也驚醒汗發背覺窗櫺凜凜有聲書中十六字記憶頗真次早備述夢狀遂飲水食棗病大愈按王斗周時隱士豈國楨即其後身歟如用固原籍生長平涼官涇川管獄員性情恬淡不營產業善楷書用筆如飛年逾花甲作小楷猶如少年時增貢則有劉世英李增榮高凌雲附貢陳慕均侯鎮世英事母至孝教子孫有法屬續前撰楹聯大旨在戒諸子勿用婦言庶永無分炊之事也

議員則有鄭濬郭修朱離明李翰孟善繼楊秉琦濬參議院議員修離明衆議院議員翰善繼秉琦俱省議會議員

李翰優級師範畢業曆署靈台狄道固原慶陽等縣縣長鄭濬軍官畢業曆任甘肅督軍衛隊營營長青海省政府軍事科科

長紅水縣知事胡師文張篤忠李和世俱大學畢業師文任甘肅第二中學校長酒泉臨潭等縣審判官篤忠任中等學校教職劉錦堂朱生燦潘懷英俱畢業上海龍門師範錦堂任甘肅第七師範學校省立平涼女子師範學校校長生燦仕縣教育局局長懷英任各學校教員

呂元字壽軒甘肅西甯人道光十年由武生入伍剿辦青海叛番平之已而東南捻匪猖獗調赴河南安徽轉戰孟津陳州項城合州水西門得勝等處所向克捷尋克復廬州及進剿焦湖逸匪生擒數賊舒城之戰敵擲石中唇落門齒三枚卒破城而有之後剿懷遠矛傷左膀已瀕危矣竟得大捷未幾捻匪又攻懷遠公馳入勢如破竹積功至巴里坤鎮總兵留守平涼相持半載衆寡不敵力盡援絕賊掘道發地雷陷西南城垣冒煙入公血戰城陷處被賊擁出勸降不屈遂遇害事聞追贈提督給卹金八百世襲騎都尉罔替兼一等雲騎尉死事地方暨原籍建立專祠

李翰華諸生也納貲得訓導同治初署安西學正未之官會逆回變作遂留辦城防已而寇圍城勢危甚翰華等四人詣慶陽乞援或勸其勿往翰華不聽竟縋城出田間道抵慶陽冒險者數矣聞者壯之嗣督糧由涇運平涼遇賊劉家廟被掠罵不絕卒以死嗚呼逆回之叛死節者知縣張仁源拔貢趙青藜總兵呂元已俱見於前矣歲貢有朱本成金鑑袁愉任應吉王愷武舉則有時萬

年士庶幾八千人以上婦女亦三千餘焉翰華其尤者故序列之  
桑桂成化間舉人授大名府通判廉靜好古重風教酌定禮儀鄉  
人踵行初母宋氏疾篤桂割股愈疾後在京師父卒於家桂以為  
未得與喪悲號悔歎自此至終身人未見有快意時

侯政監生母疾危晝夜禱天祈以身代割股和藥以進母疾愈後  
任濟陽知縣聞母喪悲號不食而卒

張金榜字耀吾性剛直倜儻尚義氣聞人有不平事輒挺身出為直  
之不避權勢以歲貢授商州訓導州士為強豪侵虐金榜至集諸  
生訓以恪守學規毋干紀律及預外事苟有非意之侮吾為爾任  
無何王生某有田數十畝巨室欲奪之密屬通判困生生以田遺巨  
室求解金榜聞之力爭州判與巨室俱詣學謝讓以大義遂不奪生  
田李自成初陷商南殺令屠城監司檄金榜署縣事金榜掩死骨  
招遺民厚為撫卹請蠲田租三年舊例蠲租不蠲徭徭為縣費  
金榜一切貸之遷寧州學正歸

陳典字五典少讀書警敏開卷即能見大義文章力追史漢不落尋  
常蹊徑為博士弟子員諸生間生有至性執親之喪卧苫食蔬終三年  
如一日負土成墳事聞建坊旌表

朱氏二孫失其名年甫垂髻往別墅取租兄為賊所獲弟已潛匿聞  
賊欲殺兄即挺身出以己代兄死兄至麾弟去語賊曰願殺我請釋  
弟兄弟爭死不已賊并殺之

朱傑軒明末闖逆陷西安垂涎平涼勢洶洶銳甚傑軒自分不得脫率妻子女仰葯死

孟肖池業黃岐術明末闖逆陷潼關肖池見賊勢漸逼自鳩死平涼馬夫失姓名明末隨驛使遇賊賊殺使留馬夫為狂城馬夫陽諾已至城下馬夫乃大呼賊至賊怒磔之

王秉衡字初暘其先世縉雲人以宦蹟來平遂家焉公性孝友登萬曆丙午賢書由阜城令仕至河間府同知行取戶部員外郎崇禎末歸里值李自成陷城剽掠殆盡公宦橐蕭然為賊所困猶子業隆冒死走白渠帥誅其賊公始獲免至是祝髮棄人事芒鞋竹杖徜徉於崆峒涇水之間人莫知也後十餘年卒

孫一元字太初嘗棲太白之巔故號太白山人喜為詩風儀秀朗攜鉄笛鶴瓢遍遊中原齊魯南涉江淮吳越時劉麟以知府罷歸龍霓以僉事謝政並客湖州與郡人陸琨吳充招五人入社稱苕溪五隱舉人施侃勸之娶乃妻以妻之妹張氏生一女而卒充等葬之李夢陽有太白山人傳

胡叟字倫許安定臨涇人也少聰慧十三辨疑釋理鮮有屈焉披讀群籍屬文典雅十八歲入長安知姚宏將七關中韋祖思負重名輕叟年少拂衣而去歸魏以其識機賜爵始復男文成帝詔為文檄宋柔然遂遁去密雲旋歸故山不事產業居貧不恥視榮華蔑如也尚書李敷遺以財不受人咸欽其德云

樊處約崇信人宋建中靖國年進士文章氣誼為當時第一嘗隱遁崆峒精研修煉不問世

張煒字旭伯其先高郵人也以戍籍遷平九世至旭伯生而秀爽氣局豪邁及壯軀幹豐偉其髯如戟讀書崆峒嗜古文辭其於理致體格尤根抵先輩崇禎末年方弱冠選拔貢入成均不屑通籍往居華山之青柯枰故號為青柯居士云乃遭世鼎革遂棄功名並肆力於詩文撫院賈公聘修陝西通志一時宿彥咸擢西京文物在於斯矣生平好遊北至燕趙南涉淮泗東登岱宗賦詩見志老而歸里築茆菴於崆峒山下躬耕以終其身焉所著山水記詩若干首載入涇上遺編

朱敬聚字質楚明藩王後裔也天資穎異沈酣經籍弱冠補宗生無何滄桑變作烏失所止遂隱居崆峒以詩文自娛一時文壇詩社咸奉為宗工主盟焉晚年授徒張壽崆庶吉士王袞孝廉子詳訓導朱謀進士皆其門人刻其詩涇上編二卷行於世

單好問回紇之裔也弱冠補弟子員性沈靜工詩能文不慕榮利而尤嗜理學聞二曲李先生名即負笈往從歲餘所學益進已而撫院殷公見其詩奇之延為西賓久之殷公益為敬禮欲官之辭不就嗣殷公晉大學士同居京師數年留心著述既而歸里閉門謝客興至輒往居崆峒所作夜坐詩十首見者謂有月到天心風來水面之概

## 列女附

嗚呼俗之壞久矣自學士大夫多不能終其節况女子乎邑有無名氏女者後漢皇甫規妻也善屬文能草書時為規答書記甚衆人怪其工及規卒時年猶盛而色美董卓為相國耳其名聘以駟輜百乘馬二十匹奴婢錢帛充路氏乃輕服請卓門詭自陳請辭甚酸愴卓使傅奴侍者悉拔刀圍之而謂曰孤之威力欲令四海風靡何有不行於一婦人乎氏知不免乃起立罵卓曰君羞胡之種毒害天下猶未足也妾之先人清德奕世皇甫氏文武上才為漢忠臣君親非其趣使走吏乎敢欲行非禮於爾君夫人耶卓乃引車庭中以其頭懸輓鞭扑交下氏謂持杖者曰何不重乎速死為惠遂死車下後人圖畫號曰禮宗云於明則有二彭氏張氏謝氏孫氏楊孝姐之屬清則劉氏何氏沈氏二趙氏閻氏三王氏段氏張氏崔氏其尤者

彭氏指揮僉事甘忠妾也忠死氏哀憤不自勝遂自縊死事聞旌表彭氏趙廷璧妻也年二十三生子雲漢已而廷璧死乃剪髮納廷璧棺中誓不他人及雲漢成立竟客死氏撫幼孫守破屋八十餘年糟糠常不能饜居無何殺於歲

張氏諸生梁思聰妻也聰死時年二十一有子二俱幼氏誓不再適家貧甚無以自活然節操無少玷日惟女紅自給匍匐五十餘年萬曆中巡按徐祕始上其事得旌

謝氏諸生張化龍妻也夫痛疾氏侍湯餌唯謹矢溺污穢衾褥氏日為拭澣終三年無倦色夫久病多恙稍不慊意即大詬詈氏輒婉謝之及夫死三日斂已縊死柩前

孫氏朱明斬妻也夫死遺子海山始數歲氏屬海山翁姑七日不食未得死乃以刀自剄死葬同穴

孝姐楊自有女也明末流賊猝至父母不及顧孝姐先已逃去孝姐面污泥匿薔薇叢處賊搜得脅之行大罵不屈遇害

劉氏故民白宗道之妻苦節可貞聞上奉諭建坊旌表

何氏女姚永福聘妻也與鄰媪採苦菜於野田進禮悅其少艾欲污之女堅拒瓜裂進禮面血淋漓下進禮怒擊殺之康熙三十七年詔旌其門

沈氏王應亨妻也應亨遠出有諸生郭鍾者排闥入戲誘之氏厲聲叱呵之郭知事不得諧走去氏憤甚遂自縊死雍正二年旌之閔氏紀成妻也初字時會王輔臣叛賊至利其色欲掠去氏奔投崖落崖半樹間賊已去其家取舁之至家三日始生已而夫死氏年二十一有遺腹後生子氏辛苦萬狀志操堅節撫子成立年七十八卒王氏故民張魁之妻節孝兩全事聞奉諭建坊旌表

王氏貢生連泰拔妻也拔死氏年十八子始周歲苦志守節孀居八十餘年所遭坎壈他人不能一朝居而氏處之裕如終身不聞詬誶

聲

王氏諸生陳志妻也氏年二十三歲志已死產遺腹子勛備歷艱辛竟撫勛至成立年八十二卒

歲貢生張金鑄妻段氏年十六于歸金鑄事舅姑甚得婦道金鑄嘗屏人居治經旬月不出戶氏晨夕侍餉每至輒從容問古事或憑几摹畫金鑄所作書時能肖其粗處同治初叛回猝至家人壯者俱逃去金鑄亦逃氏逃未得出遇賊賊以刀脅氏氏堅不屈賊斫氏項不斷者三寸許氏恚罵不絕賊怒磔裂氏左臂血淋漓扑地已而賊退金鑄返氏曰吾家什物悉被掠去惟破書數冊君所常手者妻謹匿懷中幸得完全君可自解襟取之妾自分不起矣語訖泣數行下金鑄亦泣且語語不可了氏促金鑄曰君趨去勿為妾故久留賊方退不遠即復來君亦妾之續矣誰持張氏門戶者金鑄如誠挈書去去未數步反顧而氏色死矣乃為收葬而去光緒中入昭忠祠張氏生員朱復初妻崔氏祁化普妻俱苦節守志五十餘年烈女成仁當民國十八年是時歐化盛行我國禮教掃地盡矣咸以為翹出如烈女所謂叔世祥麟女中威鳳也遂群相醵貲豎石鐫始末其上以風巾幘文曰烈女名淑貞平涼莎蘿鎮國會議員鎮原令虛齋朱離明之女也幼聰慧讀史傳遇貞烈事迹輒健羨不已年十六喪母又二年許固原楊氏婿曰淡娃未歸而淡娃死女聞之悲哀欲自裁或慰解且詰以如父何因俛默之遂不復言前計而素服廢膏沐事父益謹且周然欲死其婿未嘗每飲忘也



一日其翁挈杏子一榼問遣父以啖女女對之淚涔涔下不咽一枚父憐其志屏杏子不令見後十閱月有擬聘者方闕說中女以謂已成議背人嗚咽飲泣數日勺漿不入口已而吞毒家人不知也是日脯時若將如廁者下床暈顛不能步尋就卧僕媪異之以白其父徹夜營救無及已予聞狀以其貞烈也走哭之見其面色如生左掌有遺墨數行半模糊不可認可認者曰哀哀父母生我劬勞及烈女不更二夫十四言而已先是女志已決父之母舅某在其家女乘間謂某曰煩邀我翁來有所言某曰若何言可語我為若往達之女曰所言非能代也某固不解人事竟不為之女乃書片紙曰兒妻願學共姜死不易心今事急婿在地下將從之恨不面訣敢以書聞云蓋即其所欲言者也又曰兒生十九年祇虛度耳兒死父勿念兒志也亦命也云殆以訣其父耳女既成烈之時弔者畢集爭取讀已歎惜泣下其翁見而多之去其鄉百餘里路崎嶇甚不恤卒昇葬乃婿墓側在固原東鄉楊家坪鄭濬記碑聯曰窀穸卜夫家青山無分埋香骨梓桑留女範白石有緣寫俠心云云

節婦劉氏山東人邑宰兼涇原區行政長楊承基妻也承基於民國十九年八月因事遇害劉氏赴刑場涕泣含殮訖即欲自盡經兄嫂防護婉勸未果乃吞毒以死時年二十七歲與夫合葬於平涼西

原

祥異

和氣致祥乖氣致異氣息之感召休徵變異隨之顧其理則濫觴於河洛詳衍於洪範漢儒董仲舒劉向父子頗著論之而眭孟夏侯勝京房谷永李尋之徒又各引申其說以占驗休咎此班氏五行志之所由作也徵以內典同感惡緣當土衆生覩諸一切不祥境界或見二日或見兩月乃至暈適珮玦彗孛飛流負珥虹蜺等惡相則其事益信然則五事之修否五行之庶徵隨之非惟百司之職同業所感祥異各以類應合識之倫亦均與有責焉為述其事於左

漢光武建武七年四月丙寅日有暈犯白虹貫暈在畢八度

按後漢書畢為

邊兵秋隗囂反侵安定

晉成帝咸和六年趙雍州刺史石生上言蛇鼠鬥於安定府間二日

蛇死

時安定陷後為石勒太和四年

明成化十三年七月隕霜殺稼二十一年飢二十三年冬飢

宏治十四年正月朔地震有聲如雷地裂湧水自朔至望未已

正德七年有女子化為男生鬚已而生二子

嘉靖七年大旱人相食三十七年十月霪雨秋禾盡漂城垣廬舍傾

圯殆盡民死甚衆

萬曆十年大旱飢十四年大旱十五年春大疫

崇禎十年七月大旱蝗飛蔽天禾穀立盡

清順治十一年六月地震有聲如雷壞房舍人民多壓斃者十二年

二月初旬天雨蕎麥莞豆煮之成紅水

康熙二十四年大稔冬梨生花三十四年地震三十六年朱橋松家園  
產靈芝一本高尺餘大如盤盂五色俱備四十三年地震五十二年旱  
飢五十七年五月二十一日地震五十九年旱飢

雍正一年民陳守諫一百一歲

道光二十六年大飢

咸豐七年飢

同治七年大飢

光緒三年飢二十四年冬十一月崆嶺桃華二十六年旱飢

宣統三年秋彗星見

民國九年十一月初七地大震有聲如雷壞民舍牲畜甚衆翌日  
夜大風黃霧四塞連動至月餘未已

十七年旱麥未播種

十八年大飢斗麥十二元

十九年十二月日有暈抱成反弓形

二十一年七月大疫傳染甚速患者輒死狀似痧症西醫名曰虎  
烈拉

二十四年四月大雹夏禾壞損盡淨七月太白晝見月餘

是月共匪徐海  
東甌縣境

二十五年十一月至十二月連見日有暈抱負珥

時有雙一二  
之變

漢安定侯劉賢燕刺王子宣帝封子延年嗣延年死孫昱嗣免今平涼府

元秦王忙哥剌世祖第三子至元十年益封其府在長安者為安西在六盤者為開城皆聽為官邸十七年薨

明韓藩憲王太祖第十八子洪武初封韓王永樂五年薨葬南京牛首山子嗣封為恭王始國平涼薨庶長子開成王嗣封為懷王薨無子弟西鄉王嗣封為靖王薨庶長子高陵王嗣封為憲王薨庶長子廣安王嗣封為悼王薨無子弟彭化王嗣封為康王薨庶長子渭遠王嗣封為昭王薨世子嗣封為莊王薨王嫡長子嗣封焉

按明史洪武二十四年封皇二十子松為韓王國開原皇二十二子楹為安王國平涼永樂初廢移韓王國平涼

憲王子封郡王者二襄陵王樂平王

恭王子封郡王者四傳世者二褒城王通渭王漢陰王無後

惠王子封郡王者二高平王降為庶人西德王

康王子封郡王者五傳世者四隴西王無後寧遠王長泰王永福王

建寧王會城安置

昭王子封郡王者三長洲王崑山王長樂王

敬王子封郡王者四高淳王休寧王慶陽王通安王

明平涼侯費聚洪武時封兼總兵

韓藩憲王恭王懷王靖王惠王悼王康王昭王莊王墓俱在縣東南  
褒城王通渭王墓在縣北玉盤山即今葉家堡民國二十三年秋被涇  
水冲决壙道嵌有石碑志曰王諱融炆乃太祖高皇帝八世孫韓  
恭王六世孫通渭莊簡王之玄孫榮靖王之曾孫恭裕王之孫安  
定王之子嫡母妃靳氏之出生母黃氏正德丁丑九月二十八日王生  
焉嘉靖二十二年二月十七日襲封通渭王嘉靖二十三年正月初  
四日以疾薨享年二十八歲夫人温氏涇州世家温仲春之女嫡庶  
生子五人姬一未名儲嗣王爵庶四長曰謨垓次曰謨墟三曰謨坩  
四未名嫡庶生女五人嫡二長卒三俱未封上聞訃輟視朝一日  
遣行人司行人李楫御祭持諡曰端順命有司治喪葬如制  
文武官皆致祭焉以嘉靖二十四年正月初八日葬於平涼縣小蘆  
里玉盤山之原嗚呼王以宗室之親為國藩輔茂膺封爵富貴  
兼隆茲以令終夫復何憾爰述其概納諸幽壙用垂不朽云  
漢陰王平利王懷簡王墓在縣南

襄陵王墓在縣西北樂平王墓在縣東北

都御史趙時春墓在縣南紅照壁溝塬上

都御史周鑑墓在縣西南五里即今二天門南塬

清咸同之際洪楊肆亂朝廷方用兵東南未遑西顧而陝回乘間  
蜂起其族之在甘者亦所在響應同治元年陷固原二年春圍平涼至  
八月十二日用地雷轟陷之全城十餘萬丁口殆盡屠焉自是厥後隴

上城廓無完土閭里絕煙火田野徧蒿蓬者幾十載子遺之氓百千不一存嗚呼慘矣比至同治七年左文襄公奉命西討以次肅清陝境翌年十一月移節平涼扼秦涼之吭以肆撻伐嘖鋒金積踣之殪其醜馬化澧鑠甯朔掇隴右大膊於河湟窮眦甘涼酒泉間遂降奏捷積年兇悍殘虐之寇一鼓盪平之其有造於甘者豈有既乎惟公行節駐平最久惠平人尤厚時經大亂之餘平人得脫不死者率流亡他鄉公謀所以招徠之法人與樵採之具一令樵以供軍倍其值以勵之軍不乏薪而民得食當時城廓田園皆樵場一人採樵得值可贍數口長老至今猶艷稱焉迨流亡稍集則遣還隴畝給牛畜籽種使耕植之既又置義學給官書置師以教之浩劫餘生得有今日者絲粟皆公力也因志其事以示來者

邑里長一役花戶不與老戶充之昉自天聰三年編賦役冊以百十戶為里推丁多者十人為長餘百戶為十甲甲凡十人歲役里長一人催辦錢糧凡十年一日先後各以丁口之多寡為次其單丁獨戶不堪任役者附於甲尾名曰花戶此定例也第戶有消長田有買賣一再傳後花戶或連田阡陌而不供差後老戶或地無立錐至有一甲僅存一二族者乃一年一充或間一年一充卒至傾破其產向隅之泣莫此若者雍正以役徵糧之弊上下苛派名色不一合邑共攤同出者名曰輓抬有各里各甲輪轉獨攤者名曰硬馱為累滋重民不堪命於是立徵糧滾單法以每里或十戶五戶止用一單於納戶

名下注明田若干該銀若干春應完若干秋應完若干分作十限每限應完若干給與甲內首挨次滾催一限若完一限又依此滾若有一戶不完察出究處向使此法常行則納戶無從拖欠而里長亦免鞭笞之慘矣顧不便歟

明朱勇群牧所千戶五世同居旌表其門

明張好問字希明其先高郵人始祖仁以醫事韓王遂家平涼好問尤精祖業不拘古方唯濬病源療疾弗問貧富校餽遺官為良醫正診視神驗所著有張氏醫精太素集時巢鑑等書由浙寓華亭為隴右王侍醫是時有劉聰者亦療治奇應擅名一時

清郭寓公忘其名南產而宦裔也慕平涼氣勢高寒山川雄厚訪黃帝之遺跡尋崆嶺之名勝遂家焉寓公夙奉仙蝶屢著靈異蝶嗜組與佳釀歲時不乏若其家有休徵焉蝶至則氣象光昌滿室生輝飛舞翩翩若人之忻慰然者飲與頗豪久之乃去越數日必有喜慶紛集若有咎徵焉生則神色慘沮雖佳釀供奉亦不少啜移時即不知去向習以為常不數日輒遭拂意當同治初年狗氛日惡郡城被圍城防戒嚴地方乃禁居民逃亡寓公乃僑裝祭掃車掛紙錢盡室偕行混跡出城遂免於難得勿仙蝶預示機宜歟

